

# 廣東歷代詩僧簡介（八）

慧光居士

## 今攝

今攝字廣慈，番禺崔氏子，世席豐腴未脫俗。初參天老人，早已留心宗乘，老人曰汝要究竟，此事非出家不可。及歸即以世典分散諸子，嚴辦披緇，依老人三十年如一日，居侍寮最久。後充雷峯監院諸職，叢林營建多所經畫，以徹悟爲則。乙卯離亂中冒險入嶺，老人知其有決定志，隨處提撕，時有進益，復出嶺入淨成侍，老人極力披剝，始拈却碍膈物，於庚申付法，偈曰：已住廬峯十二年。水雲深處落機前，於今解進竿頭步。穩坐千峯跨五天。時年六十二矣，爲函昞第十法嗣。越六年示寂談笑自如，命遺骨灰飛，師蓋始終皆解脫云。刻有巢雲遺稿。

## 秋蟬

爲愛清秋白露時，滿腔積緒向誰披。乍依紅葉任舒卷。長噪碧雲遠險夷。殘月曉風偏入夢。登山臨水倍堪思。不須切切頻相告。自有知音過子期。絕塵高蹈一身輕。濁世徒勞怨獨清。長挹金風資冷韻。只茹珠露謝貪名。曉飛自愛雲山勝。晚噪如聞天籟聲。不似芳時鶯語巧。三秋常有雪霜情。

## 秋月

一輪高掛五峯前。雲散長空正可憐。自與金河同混派。不教玉殿重含烟。孤踪掩映澄潭底，疏影朦朧瘦竹邊。寄語烟波垂釣叟。蘆花堪繫月明船。

## 送陸亦樵上白崖

步入東南翠靄重。白崖深處霧烟封。金鵝咫尺通三疊。玉鍊千尋并五峯。學易欲隨才子後。讀書偏傍謫仙踪。他年副墨藏名壑。百變風雲共淡濃。

陳顥菴先生讀廣慈詩絕句云：玉露金風好自持。高山流水耐人思。入詩惟有秋蟬好。天籟悠悠穩一枝。歸雲深處含機宜。明月時來助我詩。磯畔烟波無碍物。蘆花長繫釣魚絲。

## 今嚴

今嚴字足兩，順德人，族姓羅，原名殿式，字君爽，邑諸生。與兄寅皆有文名，梁朝鍾梁祐遠皆呼爲小友。弱冠從天然禪師求生死大事，已丑脫白受具。其母頗知書、相繼落髮。嚴性孤高好潔，不能容物，遇非其人，雖貴勢不肯晉接。居雷峯丈室最久，人罕見之。戊戌奉命往嘉興請藏，還至歸宗，閱大藏一週。遭歲儉，日止一糜，研覽不輟。病還雷峯，愛棲賢山水之勝，抹病強行，居無何竟以宿疾蛻於五乳峯靜室。嚴道念甚深，知解明敏，少弘毅之力，故不獲肩荷祖道，要之非禪宿所敢望也。有西窗遺稿一卷，秋懷百合諸詩，尤爲世所傳誦。

## 詠冬月恭祝本師和尚同賦

皎然凝靜夜。萬象此森森。素色渾江漢。寒輝自古今。劬同冬日愛。肅若秋霜深。光景徒勞仰。臨風但寫心。宿廣州制止寺聞菩提葉聲作

蒼苔東晉殿。嘉樹六朝餘。葉向春風老。聲飄秋雨初。虛堂清磬斷。高枕客情疏。遙想山中夜。長吟一草廬。過寶積寺探景泰禪師卓錫泉

地闌蕭梁代。幢標南漢年。登臨吾輩重。懷想古人賢。宴坐消長晝。清言入暝烟。更欣情所樂。一飽杖頭泉。

## 山中吟

十載三朝裏。孤峯五夏僧。開扉憐月墮。撫竹看雲興。黯黯何所極。冥冥天欲層。草堂清興發。遙見下方燈。

百合詩并序

百合花，卉本之清標者也。予昔在廣，於友人亭樹間見之，云致自羅浮百花澗中。丙申入廬山棲賢谷，破寺茅齋，蓬蒿沒人，荒陂石壁間，茲花殊夥，折之瓶盃，把玩朝夕，得其性情，明其分量，委其標致。夫其敷於炎夏，榮於酷暑，則其剛方也。榛蕪錯之，翹然獨秀，則其孤往也。靜夜而芳烈；沈陰而潔鮮，則其冥行也。色悴於日中，氣斂於景側，則其知時也。若夫名未通於三百，芳不著於楚辭，愚謂見遺夫古人而不知善藏其用也。噫，一物之微，有足多者，感而賦之，貽諸同好焉。

石壁西邊古澗東。綠陂濃蔭隱香風。孤根寄去一丘外。素蕊開時六月中。嘒嘒晚蟬山寂寞。冷冷疏磬月朦朧。閒心此際分明極。玉質幽香迥不同。未得芳名挂楚辭。都緣清絕畏人知。休誇玉樹臨風好。想見紅蕖映日時。姑射山頭空有夢。蕊珠宮裏正相思。可憐影沒荒岑外。惆悵殘陽欲待誰。暗香浮動又斜暉。幾度臨風入素闥。名士握來當玉塵。仙人携去綻雲衣。木蘭形似神偏瘦。杜若芳同體較肥。相對每宜人定後。夜鐘微月屢開扉。不堪鷓鴣最先鳴。冒雨開殘暑未清。簷蔔將來何所似。優曇恐是有虛名。白雲只可自怡悅。流水翻能移性情。一自與君投分後。幾多懷抱付他生。

棲賢寺寄懷頓修詞衍

嘗疑別賦銷魂語。道是江淹好過情。千日離思惟有夢。十年懷抱始相應。每從天際窺帆影。想見虛廊憶履聲。吳越江山不可問。那堪重與話三生。遲日空山感易生。依稀猶記別時情。梧桐一葉羅浮寺。砧杵千家雁翅城。高樹遠峯寒月影。暗蟲疏雨夜鐘聲。此時擬賦思君詠。直至今始得成。

殘冬歸宗閱毘尼憶阿公時阿公出藩陽之千山

閱盡毘尼歲又催。擁爐深夜撥寒灰。念予計日歸三峽。知子何時過五臺。多病會供匡嶽雪。一身聊寄玉關梅。荷担大道思賢者。望斷孤鴻絕塞來。

秋懷

又逢歲晚客心驚。病骨遙憐萬里情。長聽哀笳吹漢曲。幾看邊月照秦城。山中薄雪難爲賦。塞外重裘尙厭輕。芳草綠時相憶否。江南二月好鶯聲。道法多年歎陸沉。令人懷古更情深。會期慧業同他日。豈謂蹉跎尙至今。箕子舊封知問禮。蘇卿雪窖幾長吟。從來練達都經歷。相見應知慰夙心。

粵王城外海東垂。野客吟餘山寺時。月閨秋光菊早發。江關峯斷雁來遲。候邊砧杵侵朝急。警戍清笳徹夜吹。聞道六朝陵寢處。西風依舊漢旌旗。一夜嚴霜萬木貧。蕙蘭摧盡憶閒身。空聞東海悲田客。誰是湘州舊吏人。靈武幾年瞻帝子。睢陽十日痛張巡。心勞幻境聊相記。更莫哀吟易愴神。遙夜空山獨自求。無端身世有微憂。十年未盡多生習。五斗能消一月愁。黃葉尙繁霜漸促。蒼鷹纔縱勢全收。笳吹此際平乘上。指點燕雲說九州。慘慘炎荒秋氣陰。感時因事憶王琳。千家旅食羈臣淚。十載馳驅故國心。北海月明瓊塔出。西堂雨過一鐘深。匡門日暮空翹首。蘆荻漁歌自古今。星河影動雁初飛。物序淒清事漸違。應候砌蟲吟切切。望秋梁燕語依依。芙蓉香遠風難斷。葭菼根孤露易晞。惟有白雲無別恙。夜深隨月到禪扉。暮雲笳鼓暗城頭。塞北江南尙未休。忍見魯連甘蹈海。遙憐王粲苦登樓。七哀聊賦當年恨。九辯如悲萬古秋。想到高峯明月夜。吟來猿鶴亦生愁。地僻山迴水國陰。籬花纔發又秋深。飄搖鷹隼天中起。寂寞魚龍夜半吟。葉已辭柯誰問侶。人長作客若爲心。峯前幾度遙西望。日暮迢迢擊鼓音。冷於秋水淨於雲。海際時懷鷗鷺羣。哀樂過人徒自苦。肝腸如雪恨空聞。拙無長技甘匏落。病亦清談到夜分。肌骨漸消寒漸凜。幽齋長閉把香焚。

南海神祠

沈沈古廟控南蕃。寵祀千秋帝主恩。銅鼓舊傳交趾供。石碑猶見大唐存。雲運波勢搖珠海。月共潮聲暗虎門。多少樓船與客使。幾回經歷幾銷魂。

浴日亭

翹首孤亭夜欲闌。遠霞先映衆星繁。海門萬頃黃金地。天末高擎赤玉盤。帆出抹胥光乍暗。潮生黃角氣猶寒。東西上下成今古。贏得高吟眼界寬。

春懷

江南二月草初肥。斷雨含雲沒曉暉。去國雁雛憐短羽。傍人燕子試新衣。橋橫野岸潮聲濶。春正幽巖花氣微。惆悵東風楊柳外。耦耕田父荷鋤歸。深篁啼鳥不知春。夢斷蓬門高臥人。一榻維摩安嬾病。三生圓澤委風塵。雲歸遠岫勞黃鶴。魚去空潭長白蘋。滿地夕陽樵笛怨。落花何處不沾巾。木棉花發子規啼。柳色青青葉未齊。似我無家南浦客。更逢多病越山西。人憐芳草歸殘驛。雨帶新潮入舊溪。蓬戶竹窗空自掩。春風何處笑相携。幾家楊柳半溪烟。漠漠層雲去雁天。破寺晚鐘疏雨後。亂山樵笛夕陽邊。鶯花漸老春歸戶。燕麥初收人種田。試看王孫昔遊處。東風依舊草芊芊。

陳顛菴先生讀足兩詩絕句云：草莽羈臣氣未降。感時因事哭西窗。秋懷悽愴春懷怨。偏愛唐人盛世腔。百家村外踏花行。伐木吟成念友生。（編者按集中有伐木吟多首思友生也）托鉢蕭蕭闔閭下。何堪細雨早鶯聲。聞道六朝陵寢處。西風依舊漢旌旗。（足兩秋懷句）雲山尙有悲秋客。寂寂魚龍意可知。

今白

今白字大牛，番禺人，族姓謝，原名凌霄，邑諸生，偶儻人也。善談諧，舉止閒適，詩文皆有奇思。癸巳皈天然禪師，薙染登具。丙申值雷峯建置梵刹，工用不貲，白發願行募，人募三分，沿門持鉢十餘載，叢林規制，次第具舉。所至之地，方便接引者甚

衆，人皆稱爲今白禪師。一夕行乞，即次端坐而逝。蛻後數年，有陝商某途中遘疾垂危，夢青衣數輩攝至一殿，戈戟林列，呼商至階，捶撻將及。忽見空中金光燦，殿上人驚起作禮，商遂得脫。道旁觀者皆云爾等獲釋，乃雷峯今白禪師力也。商病甦，趨雷峯訪問，始知師化已久。師慈願及於幽冥，其永明禪師之流歟。準提閣

高枕孤峯清夢餘。風光依舊滿西湖。雲霞舒卷自朝夕。山水參差誰畫圖。晴日鏡中浮百雉。春烟橋外染千株。人間好景知何限。纔入閒僧眼便殊。

永福寺

鵝湖湖面水爲波。搖曳東風軟似羅。永福門前看若此。朝雲山下又如何。黃金勝地應難借。白首春光不易多。四十餘年成底事。好將殘夢付藤蘿。春經白寒兔（自陷隍至通判府多峻嶺中有大澗泉行石上如雷奔雪飛土人呼爲白寒兔從嶺路上俯視萬仞亦奇觀也）

數里雷霆喧白晝。一谿風雨洗晴春。千年樹下未歸夢。萬仞峯頭欲老身。流水無心尋杖笠。雲霞有影伴閒人。高低曲折山前路。又遣芒鞋入世塵。

潮城閨三月

韓江東望水連天。海燕南歸又一年。世外有僧非佛骨。人間無欲是神仙。陰那萬仞眞慚愧。瓶水千株也大顛。閒閱三春又三月。青山無恙且安禪。（陰那山祖師號慚愧在程鄉大顛祖師於潮陽山中植龍荔千株置一銅瓶日灌溉之株盡而瓶水不竭）初夏開元寺寒雨寫懷

細雨當樓一榻深。樓前草色淨沈沈。閒中倍念勞生事。冷處偏宜老衲心。古殿且看千眼佛。高山休撫伯牙琴。莫疑當暑餘寒意。炎熱須教雪滿襟。

陳顛菴先生讀大牛詩絕句云：人間風景是榮枯。纔入閒僧眼便殊。炎熱須教滿襟雪。寫懷老衲有深吁。大顛瓶水意何窮。洗盡人間色與空。世外有僧非佛骨。此情眞欲問韓公。（未完）